

Na osnovu člana 8. i 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", br. 49/06 i 51/09), člana 10. i 68. Statuta Općine Centar Sarajevo – prečišćeni tekst ("Službene novine Kantona Sarajevo", broj: 23/04), Općinsko vijeće Centar Sarajevo je na _____ redovnoj sjednici održanoj dana _____. 2020. godine donijelo

O D L U K A

O JAVNIM PARKIRALIŠTIMA NA PODRUČJU OPĆINE CENTAR SARAJEVO

I OPĆE ODREDBE

Član 1.

Ovom Odlukom se povjerava upravljanje javnim parkiralištima, utvrđuju uslovi, način korištenja, organizacija i način naplate parkiranja vozila na javnim parkiralištima na području općine Centar Sarajevo.

Član 2.

Javnim parkiralištem se smatra javna površina namijenjena i saobraćajnom signalizacijom označena isključivo za zaustavljanje i parkiranje vozila, određena ovom Odlukom.

Upravljanje javnim parkiralištima na kojima se naplaćuje parkiranje vrši davalac komunalne usluge (javno preduzeće komunalnih djelatnosti ili privredno društvo) (u daljem tekstu: Upravitelj), a na osnovu zaključenog ugovora sa Općinom Centar Sarajevo.

Javna parkirališta, pod uslovima utvrđenim ovom Odlukom, koriste se za parkiranje motornih vozila pravnih i fizičkih lica (u daljem tekstu: Korisnik).

Korisnikom parkirališta, u smislu odredaba ove Odluke, smatra se vozač ili vlasnik vozila ako vozač nije identifikovan.

Član 3.

Javna parkirališta mogu biti uređena za parkiranje vozila na ulici i van ulice.

Javna parkirališta van ulice mogu biti otvorenog i zatvorenog tipa.

Otvorena javna parkirališta su ona parkirališta koja zbog saobraćajne situacije nije moguće fizički zatvoriti preprekama.

Zatvorena javna parkirališta su parkirališta koja se u cilju kontrole ulaza i izlaza vozila mogu fizički zatvoriti, a da se ne remete normalni tokovi saobraćaja.

Član 4.

Javna parkirališta moraju biti označena saobraćajnom signalizacijom u skladu sa Zakonom o osnovama bezbjednosti saobraćaja na cestama u Bosni i Hercegovini i Pravilnikom o saobraćajnim znakovima i signalizaciji na cestama, načinu obilježavanja radova i prepreka na cesti i znakovima koje učesnicima u saobraćaju daje ovlaštena osoba.

Parking mjesta određena za vozila osoba sa invaliditetom i rezervisana parking mjesta, posebno se obilježavaju horizontalnom i vertikalnom signalizacijom.

Rezervisana parking mjesta su prostori rezervisani od strane korisnika kod Upravitelja.

Uređenje i obilježavanje javnih parkirališta na kojima se naplaćuje parkiranje vrši Upravitelj istih.

Član 5.

Javna parkirališta na kojima se naplaćuje parkiranje, označena su horizontalnom i vertikalnom signalizacijom, u skladu sa propisima o sigurnosti saobraćaja.

Vertikalna saobraćajna signalizacija (na vidnom mjestu istaknuto obavještenje na saobraćajnim tablama) sadrži:

- oznaku „P“ (parkiralište) - skraćeni naziv parkirališta,
- broj parking zone,
- upozorenje o obaveznoj naplati usluga parkiranja,
- cijena usluga javnih parkirališta,
- upozorenje da će vozila parkirana na nedozvoljenim (neobilježenim) mjestima biti blokirana uređajem za blokiranje točkova „lisicama“,
- radno vrijeme naplate usluga parkiranja.

Horizontalna saobraćajna signalizacija označava se u skladu sa propisima o sigurnosti saobraćaja.

Korisnik je dužan vozilo parkirati u skladu sa horizontalnom i vertikalnom signalizacijom, odnosno u skladu sa uputama koje mu daje ovlaštena osoba Upravitelja, ako parkiralište nema horizontalnu signalizaciju (ako podloga parkirališta nije asfaltirana ili betonirana).

Član 6.

Ulaskom na javno parkiralište na kome se vrši naplata Korisnik prihvata uslove parkiranja propisane ovom Odlukom.

II USLOVI I NAČIN KORIŠTENJA JAVNIH PARKIRALIŠTA NA PODRUČJU OPĆINE CENTAR SARAJEVO

Član 7.

Javna parkirališta s naplatom na području općine Centar Sarajevo, kategorišu se po vrsti i zoni parkiranja, a u skladu sa Programom parkiranja na području općine Centar Sarajevo.

Program parkiranja iz stava 1. ovog člana donosi Općinsko vijeće Centar Sarajevo na prijedlog Općinskog načelnika u roku od tri mjeseca od dana stupanja na snagu ove Odluke.

Član 8.

Na javnim parkiralištima na kojima se naplaćuje parkiranje, radno vrijeme će biti određeno svim radnim danima i subotom u periodu 00-24 sata.

Izuzetno, Upravitelj može, zbog objektivnih okolnosti, odrediti i drugačije radno vrijeme koje mora biti istaknuto na javnim parkiralištima za koje se primjenjuje.

Nedjeljom i praznicima na javnim parkiralištima neće se vršiti naplata.

Član 9.

Za korištenje javnog parkirališta Korisnik plaća naknadu prema tarifnim zonama.

Odluku o zonama javnih parkirališta i Odluku o cijenama parking karte donosi Općinsko vijeće Centar Sarajevo na prijedlog Općinskog načelnika u roku od tri mjeseca od dana stupanja na snagu ove Odluke.

Član 10.

Vozilo s mjesečnom i godišnjom parking kartom može biti vremenski neograničeno parkirano na svim javnim parkiralištima na kojima se vrši naplata unutar zone za koju je parking karta izdata i u zonama nižim od te, a u periodu važenja parking karte.

Mjesečna i godišnja karta mora biti vidno istaknuta na prednjem vjetrobranskom staklu motornog vozila.

Član 11.

Za naplatu parkiranja na otvorenim javnim parkiralištima koristi se parking karta iz automata za naplatu parkiranja, a na zatvorenim javnim parkiralištima koristi se ulazni print listić i izlazni print račun.

Kartu za parkiranje, Korisnik je dužan istaknuti s unutrašnje strane prednjeg vjetrobranskog stakla vozila, na način da bude vidljiv serijski broj te da iz nje ovlašteno lice za naplatu parkiranja može utvrditi podatke (godinu, dan, sat i minut početka parkiranja).

U izuzetnim slučajevima, naplata parkiranja može se vršiti ručno pomoću ovjerenih blok karti.

Korisnicima javnih parkirališta i drugim licima je zabranjeno blokiranje, odnosno oštećenje automata za naplatu parkiranja (ubacivanjem neodgovarajućih kovanica ili drugih materijala i vršenje bilo kakvih radnji kojim se vrši oštećenje automata za naplatu parkiranja).

Član 12.

Korisnik otvorenog javnog parkirališta unaprijed plaća naknadu za planirano vrijeme parkiranja, a kod zatvorenog javnog parkirališta prilikom napuštanja javnog parkirališta prema podacima sa ulaznog listića.

Korisniku zatvorenog javnog parkirališta bez ulaznog listića biće obračunato vrijeme od početka radnog vremena javnog parkirališta.

Član 13.

Parking karta je dokaz o uredno plaćenju naknadi za parkiranje na javnom parkiralištu.

Sadržaj i izgled parking karata će biti detaljnije određen posebnim aktom Upravitelja.

Član 14.

Kod naplate putem automata, Korisnik javnog parkirališta, količinom ubačenog novca u automat, određuje dužinu plaćenog parkiranja ili plaćanjem putem SMS poruke, a što će biti regulisano posebnim aktom Upravitelja.

Član 15.

Pravilnost korištenja javnog parkirališta, kontrolišu ovlaštena lica upravitelja, u skladu sa aktima Upravitelja i odredbama ove Odluke.

Član 16.

Za parkiranje vozila koja koriste osobe sa invaliditetom, osigurava se najmanje dva parking mjesta na kojima se ne naplaćuje naknada za parkiranje.

Pravo korištenja mjesta za parkiranje vozila osoba sa invaliditetom ostvaruju lica koja posjeduju znak pristupačnosti, odnosno međunarodni znak invalida, a u skladu sa odredbama člana 29.

Zakona o osnovama bezbjednosti saobraćaja na putevima u Bosni i Hercegovini i odredbama Pravilnika o načinu obilježavanja vozila kojim upravlja lice sa oštećenim ekstremitetima.

Vozilo parkirano na mjestu za parkiranje vozila koja koriste osobe sa invaliditetom, a koje nema vidno istaknut znak pristupačnosti, bit će blokirano uređajem za blokiranje točkova – „liscama“, a troškove deblokade snosi vlasnik vozila.

Član 17.

Korisnik javnog parkirališta čini povredu odredaba uslova korištenja javnog parkirališta propisanih ovom Odlukom ako:

1. Prekorači dopušteno vrijeme parkiranja,
2. Ne istakne, nepravilno istakne ili istakne neodgovarajuću parking kartu s unutarnje strane vjetrobranskog stakla,
3. Ne pridržava se horizontalne i vertikalne signalizacije na javnom parkiralištu,
4. Zauzme vozilom dva parking mjesta, odnosno vozilo parkira dijelom na parkirno mjesto, a dijelom van njega, čime se onemogućava korištenje parking mjesta pod naplatom,
5. Parkira ili zaustavi vozilo na parking mjestima predviđenim za osobe sa invaliditetom, te parkira i zaustavi vozilo na rezervisanim, odnosno zakupljenim parking mjestima,
6. Obavlja usluge popravke, pranje vozila ili bilo koju drugu radnju koja utiče na nesmetano funkcionisanje parkirališta kao komunalne djelatnosti od opšteg značaja,
7. Ostavi neispravno ili havarisano vozilo na parkiralištu,

Član 18.

U slučajevima povreda odredaba iz člana 17. ove Odluke, izvršit će se blokiranje vozila uređajem za blokiranje točkova.

Poslove blokiranja i deblokiranja vozila će vršiti ovlaštena lica Upravitelja.

Detaljnije odredbe o postupku blokiranja i deblokiranja, regulisat će se posebnim aktom Upravitelja.

Član 19.

Posebni aktom Upravitelja utvrdit će se:

1. naknade za blokiranja i deblokiranja vozila, i to posebno naknade za blokiranje i deblokiranje putničkog vozila, a posebno naknade za blokiranje i deblokiranje kamiona, autobusa, priključnog vozila i radnog stroja,
2. naknade za premještanje i čuvanje vozila, i to premještanje i čuvanje vozila na deponijski parking i ležarina do 24 sata i dnevno čuvanje vozila na deponijskom parkingu.

Član 20.

Premještanje nepropisno zaustavljenih, ili parkiranih vozila, vrši Upravitelj parkirališta, a na osnovu naloga nadležne policijske uprave, u skladu sa Zakonom o osnovama bezbjednosti saobraćaja na putevima u BiH.

Detaljnije odredbe o uslovima, načinu premještanja, čuvanja i vraćanja nepropisno parkiranih vozila regulisati će se posebnim aktom Upravitelja.

Član 21.

Postupak premještanja vozila smatra se završenim kada je motorno vozilo spušteno na platformu specijalnog vozila "pauk".

Prilikom određivanja premještanja, odnosno blokiranja vozila od strane ovlaštenog službenog lica prije početka premještanja, odnosno blokiranja, ovlašteno lice Upravitelja, pravi Zapisnik o stanju vozila koje je određeno za premještanje, uz posebno evidentiranje već vidljivih oštećenja na vozilu koje se premješta.

Član 22.

Prije početka premještanja vozila, ovlašteno lice Upravitelja je dužno fotografisati vozilo i napraviti zapisnik o tome, a po mogućnosti napraviti i video zapis motornog vozila koje se premješta.

Član 23.

Troškove premještanja vozila na drugo mjesto i naknadu za smještaj tih vozila, odnosno blokiranje i deblokiranje vozila, snosi vlasnik vozila, odnosno lice koje upravlja vozilom.

Član 24.

Štete na vozilu nastale za vrijeme premještanja vozila, za vrijeme čuvanja na deponiji, odnosno blokiranja i deblokiranja vozila, snosi Upravitelj.

Član 25.

Održavanje, uređenje i čišćenje javnih parkirališta vrši Upravitelj.

Održavanje, uređenje i čišćenje podrazumijeva:

1. horizontalnu i vertikalnu signalizaciju,
2. održavanje slivnih rešetaka (poklopaca i šahtova),
3. uređenje asfaltnih površina,
4. redovno održavanje higijene,
5. kao i uklanjanje snijega, poledice i drugih elemenata koji ometaju parkiranje.

Član 26.

Vozila hitne medicinske pomoći, policije i vatrogasna vozila, kada u toku intervencije koriste javna parkirališta ne plaćaju naknadu za parkiranje.

Član 27.

Upravitelj na javnim parkiralištima na kojima se naplaćuje parkiranje ne snosi odgovornost u slučaju otuđenja motornog vozila ili nastanka štete na istim.

Član 28.

Naplatu parkiranja i kontrolu naplate parkiranja, obavljat će ovlaštena lica Upravitelja koji moraju biti jednoobrazno odjeveni te imati identifikacione legitimacije na kojima je ispisan naziv preduzeća, serijski broj, ime i prezime i fotografiju radnika.

III NADZOR

Član 29.

Opći nadzor nad provođenjem ove Odluke će vršiti Služba za investicije, komunalni razvoj i planiranje Općine Centar Sarajevo.

Inspekcijski nadzor nad provođenjem ove Odluke će vršiti nadležna inspekcija Općine Centar Sarajevo.

Član 30.

Prekršajni postupak pokreće i vodi ovlašteno lice Inspektorata Općine Centar Sarajevo, izdavanjem prekršajnog naloga ili podnošenjem zahtjeva za pokretanje prekršajnog postupka, na osnovu dokaza dostavljenih od strane ovlaštenog lica Upravitelja.

IV KAZNENE ODREDBE

Član 31.

Novčanom kaznom u iznosu od 30 KM do 100 KM, kaznit će se vlasnik motornog vozila za neplaćanje novčane naknade iz člana 19. ove Odluke.

Novčanom kaznom u iznosu od 50 KM do 100 KM, kaznit će se lice koje ošteti automat za naplatu parkiranja.

Član 32.

Upravitelj je obavezan, u roku od 30 dana od dana potpisivanja ugovora iz člana 2. ove Odluke, donijeti provedbene akte iz članova 13., 14., 18., 19. i 20. iste.

Član 33.

Ova Odluka stupa na snagu narednog dana od dana objavljivanja na oglasnoj ploči Općine Centar Sarajevo, a naknadno će se objaviti u "Službenim novinama Kantona Sarajevo".

Broj:

Sarajevo, ____ . ____ . 2020. godina

Predsjedavajuća Općinskog vijeća

Karolina Karačić

O B R A Z L O Ž E N J E

I PRAVNI OSNOV

Pravni osnov za donošenje ove Odluke sadržan je u članu 8. i 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“ br: 49/06 i 51/09), čl. 10. i 68. Statuta Općine Centar – prečišćeni tekst (“Službene novine Kantona Sarajevo”, broj 23/4) kojima je određena nadležnost Općinskog vijeća za donošenje odluka, drugih propisa i općih akata iz samoupravnog djelokruga općine.

II RAZLOZI DONOŠENJA ODLUKE

Ova Odluka je uslov za pokretanje aktivnosti na uređenju saobraćaja u mirovanju, a koje podrazumijevaju to da se sva javna parkirališta na području Općine Centar Sarajevo urede u skladu sa Smjernicama za projektovanje, građenje, održavanje i nadzor na putevima (Službene novine BiH, broj 13/07).

III OBRAZLOŽENJE PREDLOŽENIH RJEŠENJA

U odjeljku I (od člana 1. do člana 6.) su definisane opće odredbe o javnom parkiralištu, korisniku, upravitelju.

U odjeljku II (od člana 7. do člana 28.) su definisani uslovi i način korištenja javnih parkirališta na području općine Centar Sarajevo.

U odjeljku III (član 29 i član 30.) je definisan nadzor nad provođenjem Odluke i inspeksijski nadzor.

U odjeljku IV (člana 31.) su definisane kaznene odredbe.

IV FINANSIJSKA SREDSTVA

Za realizaciju ove Odluke nisu potrebna finansijska sredstva.